

**ZAKON  
O GRADU ČAPLJINA**

## **ZAKON O GRADU ČAPLJINA**

### **Član 1. Predmet Zakona**

U skladu sa uslovima iz člana 5. stav 2. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09) ovim zakonom se uspostavlja Grad Čapljina, određuje njegova teritorija, propisuje svojstvo, organi, način izbora gradskog vijeća i gradonačelnika, uređuje donošenje privremene statutarne odluke, donošenje statuta, raspisivanje izbora i druga pitanja od značaja za primjenu ovog zakona.

### **Član 2. Teritorija**

Teritoriju Grada Čapljina čine sva naseljena mjesta, koja su se prema evidenciji Federalnog zavoda za statistiku nalazila u okviru Općine Čapljina na dan stupanja na snagu ovog zakona.

### **Član 3. Svojstvo**

Grad Čapljina je jedinica lokalne samouprave i ima svojstvo pravnog lica.

### **Član 4. Samoupravni organi**

- (1) Samoupravni organi Grada Čapljina su gradsko vijeće i gradonačelnik.
- (2) Samoupravni organi Grada Čapljina poslove iz svoje nadležnosti vrše u skladu sa ustavom, zakonom i Statutom Grada.
- (3) Mandat vijećnika gradskog vijeća i gradonačelnika je četiri godine.

### **Član 5. Gradsko vijeće**

- (1) Organ odlučivanja Grada Čapljina je Gradsko vijeće.
- (2) Broj članova Gradskog vijeća određuje se Statutom Grada u skladu sa zakonom.
- (3) Gradsko vijeće Grada Čapljina bira se demokratskim putem na neposrednim i tajnim izborima na području cijelog grada.

## **Član 6. Gradonačelnik**

(1) Izvršni organ Grada Čapljina je gradonačelnik.

(2) Gradonačelnik Grada Čapljina bira se u skladu sa Zakonom o izboru, prestanku mandata, opozivu i zamjeni načelnika općina u Federaciji Bosne i Hercegovine ("Službene novine Federacije BiH", broj 19/08).

## **Član 7. Statut**

(1) Grad Čapljina ima Statut.

(2) Statutom Grada Čapljina propisuje se i uređuje samoupravni djelokrug Grada, njegova obilježja, sjedište, javna priznanja, organizacija, ovlaštenja i način rada njegovih organa, međusobni odnosi gradskog vijeća i gradonačelnika, oblici neposrednog odlučivanja građana, saradnja sa drugim jedinicama lokalne samouprave i druga pitanja od značaja za Grad.

(3) Statut Grada Čapljina mora biti u skladu sa Ustavom Federacije Bosne i Hercegovine, Ustavom Hercegovačko-neretvanskog kantona i federalnim i kantonalnim zakonodavstvom.

(4) Statut Grada Čapljina priprema i usvaja Gradsko vijeće dvotrećinskom većinom vijećnika Gradskog vijeća.

## **Član 8. Pravno sljedništvo**

(1) Grad Čapljina je pravni sljednik Općine Čapljina i ima zakonom određene nadležnosti Grada i preuzima nadležnosti, prava, obaveze i imovinu općine čiji je pravni sljednik.

(2) Vijećnici Općinskog vijeća Čapljina i načelnik Općine Čapljina, izabrani na Općinskim izborima održanim 02. oktobra 2016. godine, stupanjem na snagu ovog zakona, nastavljaju sa radom kao vijećnici Gradskog vijeća i gradonačelnik Grada Čapljina.

(3) Općinski organi uprave i upravne organizacije, stručne i druge službe i drugi općinski organi, stupanjem na snagu ovog zakona nastavljaju sa radom kao organi i službe Grada Čapljina.

(4) Javna preduzeća i javne ustanove, čiji je osnivač općina, nastavljaju sa radom kao javna preduzeća i ustanove Grada Čapljina.

**Član 9.**  
**Privremena statutarna odluka**

Vijećnici izabrani na Općinskim izborima za Općinu Čapljina održanim 2016. godine donijet će Privremenu statutarnu odluku Grada Čapljinu u roku od dva mjeseca od dana stupanja na snagu ovog zakona, koja će važiti do donošenja Statuta Grada.

**Član 10.**  
**Stupanje na snagu**

Ovaj zakon stupa na snagu osmog dana od dana objavljivanja u "Službenim novinama Federacije BiH".

PREDSJEDAVAJUĆI  
PREDSTAVNIČKOG DOMA  
PARLAMENTA FEDERACIJE BiH

mr.sci. Elvir Karajbić

PREDSJEDAVAJUĆI  
DOMA NARODA  
PARLAMENTA FEDERACIJE BiH

Tomislav Martinović